

**Naalakkersuisut Juli 2022 naatinnagu nunatta kangiani innuttaasunut  
inuussutissarsiornikkut inerisaanermut ineriartortitsinermullu paasisitsiniaanissamik  
pikkorissaanertaqartumillu pilersaarusiamik saqqummiusseqqullugit  
peqquneqarnissaannik Inatsisartut aalajangiiffigisassaattut siunnersuut.  
*Inatsisartunut ilaasortaq Lars Poulsenimit Siumumeersumit saqqummiunneqartoq***

**pillugu**

**Inuussutissarsiornermut Aatsitassanullu Ataatsimiititaliap**

**siunnersuutip aappassaaneernejarnernanut**

**ISUMALIUTISSIISUTAA**

Ataatsimiititaliap suliarinninnermini inuttarai:

Inatsisartunut ilaasortaq Mariane Paviassen, Inuit Ataqtigiit, Siulittaasoq  
Inatsisartunut ilaasortaq Lars Poulsen, Siumut, Siulittaasup tullia  
Inatsisartunut ilaasortaq Aqqalu Jerimiassen, Atassut  
Inatsisartunut ilaasortaq Karl Tobiassen, Siumut  
Inatsisartunut ilaasortaq Knud Mathiassen, Inuit Ataqtigiit  
Inatsisartunut ilaasortaq Harald Bianco, Inuit Ataqtigiit  
Inatsisartunut ilaasortaq Aslak Wilhelm Jensen, Siumut

UKA2021-mi ulloq 3. november siullermeerinninnerup kingorna siunnersuut  
ataatsimiititaliamit misissorneqarpoq.

**Siunnersuutip imarisai siunertaalu**

Nunatta kangiani suliffissaaleqinerup annertuup annikillisaavigineqarnissaanut aqqutissanik  
nassaarnissaq siunnersuummik siunertarineqarpoq. Inuussutissarsiutinik ineriartortitsineq  
nutaaliornerlu tamatumunnga periarfissat ilagaat, paasisitsiniaalluni suliniummut taamak  
iliuuseqarnermi atugassatut pikkorissaanermut neqeroorummik ilaqartinneqartumut  
pilersaarummik saqqummiusseqqullugit Naalakkersuisut peqquneqarput.

**Siunnersuutip Inatsisartuni siullermeernejarnera**

Naalakkersuisut akissuteqaamminni allannguutissatut siunnersuummik imaattumik  
saqqummiussipput:

*Naalakkersuisut juli 2022 naatinnagu nunatta kangiani innuttaasunut paasititsiniaanissamik pikkorissaanertaqartumillu pilersaarusiamik saqqummiusseqquneqarnissaanik aalajangiiffigisassatut siunnersuut. Suliaq maannamut isumaginninnikkut suliffeqarnerullu iluani ineriartortitsinernut ingerlanneqareersunut tapitartuutaassaaq.*

Aallaavittut siunnersuut paasilluarneqarpoq, allannguutissatut siunnersuut Naalakkersuisunit saqqummiunneqartoq Inuit Ataqtigiinnit tapersernejarpoq siunnersuutaqqaartorlu Siumumit tapersernejarluni. Partiilli marluk siunnersuut maannangaaq tapersersinnaanngilaat, tamatumani oqaatigineqarluni ukiut ingerlanerini pilersaarutit naammattut suliarineqareersimasut aammalu iliuuseqarnissamut maanna piffissanngortoq kiisalu namminersortuunerup inerisarnejarnissaanut periarfissarpassuaqarluartoq, taamaattorli tamanna nunatta kangiani kisimi pissanngitsoq.

### **Ataatsimiititaliap siunnersuummik suliarinninnera**

Ataatsimiititaliamit maluginiarneqarpoq siunnersuutaqqaartorlu allannguutissatullu siunnersuut Naalakkersuisunit saqqummiunneqartoq imminnut assigiittorujussuusut. Taakkunani marluusuni Naalakkersuisut juli 2022 naatinnagu nunatta kangiani innuttaasunut paasititsiniaanissamik pikkorissaanertaqartumillu pilersaarusiamik saqqummiusseqqullugit peqquneqarput. Inuussutissarsiornikkut inerisaaneq ineriartortitsinerlu ilaatinneqassatut siunnersuutaqqaartumi erseqqissaatigineqarpoq, akerlianillu isumaginninnikkut suliffeqarnerullu iluani ineriartortitsineq Naalakkersuisut allannguutissatut siunnersuutaanni taaneqarpoq. Ataatsimiititaliap paasinninnera malillugu “inuussutissarsiornikkut inerisaaneq ineriartortitsinerlu” tunngavimmigut oqariaatsimut “suliffeqarnermi ineriartortitsinermut” ilaareerpoq, pingaartumilli “ineriartortitsinerup” pilersaarummi ilaatinneqarnissaa erseqqissarumallugu allannguutissatut siunnersuummik erseqqissaateqarfiusumik imaattumik ataatsimiititaliaq saqqummiussissaaq:

*Naalakkersuisut Juli 2022 naatinnagu nunatta kangiani innuttaasunut inuussutissarsiornikkut inerisaanermut ineriartortitsinermullu paasititsiniaanissamik pikkorissaanertaqartumillu pilersaarusiamik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut. Suliaq maannamut isumaginninnikkut suliffeqarnerullu iluani ineriartortitsinernut ingerlanneqareersunut tapertaallunilu ilapittuutaassaaq.*

### **Siunnersuutip aningaasaqarnikkut kingunissai**

Siunnersuutip piviusunngortinneqarnerani aningaasaqarnikkut allaffissornikkullu kingunissat siunnersuummut tunngavilersuutini allaaserineqassatut Inatsisartut suleriaasianni § 33, imm, 1-imi allassimavoq.


Siunnersuutip piviusunngortinneqarnerani pisortanut aningaasaqarnikkut allaffissornikkullu kingunissat ilinniagartuup ukiup affaani sulineranit annertunerusussaangitsut siunnersuummi tamanna naapertorlugu allaaserineqarsimasut ataatsimiititaliamit maluginiarneqarpoq.

Naalakkersuisut ataatsimiititaliallu allannguutissatut siunnersuutaat qulaani allassimasunik allannguinnissamik tunngavissiiingitsut ataatsimiititaliamit naatsorsuutigineqarpoq.

### **Attaatsimiititaliap inassuteqaatai**

**Allannguutissatut siunnersuut ataatsimiititaliamit saqqummiunneqartoq akuersissutigineqassasoq, ataatsimiititaliamit isumaqatigiittumit inassutigineqarpoq**

Ataatsimiititaliap taama oqaaseqaateqarluni isumaliutissiisummilu allassimaneratut paasinnilluni siunnersuut aappasaaniigassanngortippaa.



Mariane Paviasen  
Siulittaasoq



Lars Poulsen  
Siulittaasup tullia

Aqqalu Jerimiassen



Karl Tobiassen



Knud Mathiassen



Harald Bianco



Aslak Wilhelm Jensen